

**Meeqqat atuarfiata ingerlalluartumik angusaqarfiusumillu tunngaveqartumik ingerlariaqqinnissaanut periutsit aammalu misilittakkat suut aallaavigalugit ingerlariaqqittoqarnissaanut apeqquteqaat aallaavigalugu Inatsisartuni oqallinnissamik siunnersuut.**

(Siumup Inatsisartuni ilaasortaatitai)

### **Akissuteqaat**

(Ilinniartitaanermut, Ilisimatusarnermut Nunanilu Avannarlerni Suleqatigiinnermut Naalakkersuioq)

Meeqqat tamarmik pitsaasumik inuuneqarnissartik kissaatigisarpaat meeqqallu tamarmik pitsaasumik siunissaqarnissartik takorloortarpaat. Uagut inersimasutut neriuutigiuannarparput akissussaaffitta naammassisinnaanissaa, meeqqallu toqqissimasumik meeraanissaannut kingusinnerusukkullu inersimasuunerminni imaqarluartumik inuunissaannut sapinngisamik pitsaanerpaamik tuniliaqutaqartilugit.

Naalakkersuisut NAKUUSA Youth Forum-ip inaarutaasumik nalunaarusiaa soqutigalugu atuarpaat, tassanilu takuneqarsinnaavoq inuusuttortatta meeqqat atuarfiata ineriartortinnissaata pingaarutilittut inissinneqarnissaa kissaatigalugu naatsorsuutigigaat. Kiisalu inuusuttut inuunnerminnut akisussaaffimmik tigusinissamut piareersimanertik angajoqqaaminnit taper-sersorneqassasoq naatsorsuutigigaat.

Meeqqat ilaquattanit pissarsiaat pingaaruteqarput, kisiannili atuarfimmi aallartilluarnissaat taamatulli pingaaruteqartigaaq, tassani inersimasut atuarfimmi atuarnep sinnera tamaat pisariaqartunik ilinniartitsinissamik sorsuutiginnittut tunniusimasut tatiginartullu atuartut naapissallugit. Klassini nukarlerniit atuartut misigisimassapput atuartitsineq imatut aaqqissuugaasoq ilikkagassatut mannineq qitiusumillu aalajangikkat ilikkarsinnaallugit, atuartullu kinaassusertik, ilisimasatik, pisinnaasatik atuartitsinermullu isummatik pingaartinneqartuunerat misigissavaat. Meeqqat arlaannaalluunniit atuarfeqarfitsinni sumiginnagaassanngilaq, atuarfiullu sumiginnaanera pissutigalugu inuusutut kingusinnerusukkut ilinniagaqarnissamik mattunneqassanngillat. Tamatumunnga atatillugu erseqqissassallugu pingaaruteqarpoq meeqqat atuarfiata ilinniarnermik ingerlatseqqinnissamut aallaviummat.

Meeqqat atuarfiannik piffissap qiterpaarnerani nalilersuinerup takutippaa immikkoortorpassuit suli pitsannorsarneqartussaasut. Tamanna atuuppoq ilaatigut meeqqat atuarfianni oqaatsinik matematikkimillu atuartitsinermi. Taamaammat kommunit Inerisaavillu suleqatigalugit kommunini atuarfiit pillugit isumasioqatigiinnerit arlallit ingerlanneqarnikuupput. Taassuma kingorna suliniutivinnik kommunit aallartititsipput, tassani assersuutigalugu killiffimmi misilitsinnermi angusat sinneruttullu pillugit naatsorsueqqissaarinerit maannamit annertunerungaartumik atuarfinniit kommuniniillu isiginiarneqalerlutik.

Meeqqat atuarfianni paasissutissat atorlugit meeqqat atuarfianni qarasaasiakktu paasissutissanik nalunaarsuivik nutaaq ineriartortinneqarnikuuvoq. Qarasaasiakktu paasissutissat atuarneqarsinnaapput: <http://greenland.epinion.dk/SitePages/Startside.aspx>. Tassani paasissutissat pigineqartut tamaasa atorneqarput, ataatsimut katersorneqarlutik, taamaalillunilu atuisunit atorneqarsinnaasunik nalilersuinerne sakkussaallutik. Naalakkersuisut

qularutigingngilaat nalilersuineramik kommunit aallartitsinikuunerat ingerlaqqissasoq, kommunillu atuartut ilikkagaqartarnerisa annertusarnissaa atuartitsinerullu pitsaassuseqarnissaa tamatigut anguniarlugit angusassanik toraagaqarlutik nalilersuisarneq siuarsassagaat.

Ilinniartitsinermut periusissiaq ataatsimiinnermi uani kingusinnerusukku Naalakkersuisunit saqqummiutissavarput. Meeqqat atuarfianni, ineriartortitsiniarfiusut maannakku ingerlareersut saniatigut, suliniuteqarfinni pingaarnerni ukunani inassuteqaateqartoqassaaq:

- Atuarfinni aqutsisut piginnaasamikkut qaffassaaffigineqassapput
- Ilinniartitsisunngorniartarneq ilinniartitsisullu ilinniagaqaqqittarnerat pitsanngorsarneqassapput
- Atuartut ilikkagaqartarnerat atuartitsinerullu pitsanngorsarneqarnera pillugit nalilersuisarnermi sakkut amerlanerusut ineriartortinneqassapput
- Angusamik atuartitsinermillu nalilersuisarnermi sakkunik nutaanik kommunit suleqatigalugit ineriartortitsisoqassaaq
- Skolehjemmini perorsaaneq pitsanngorsarneqassaaq
- Ilitsersuisarneq ilinniagaqarnerullu ingerlannissaanut pilersaarusionerq isiginiarneqalissapput
- Atuartitsinermi qaraasiat atornerarnerat isiginiarneqalissaaq

Atuarfiit nalilersueriaasiat pitsanngorsarneqassaaq. Taamaammat atuartitsinermi suliaassanik atuarkiit suliaqartarneranni angusamik atuartitsinermillu nalilersuisarnermik ineriartortitsinissamut meeqqat atuarfiannik soqutigisaqartunik oqaloqateqartarnikkut Naalakkersuisut peqataaniarput. Taamaammat 2012-imi ukiakku ataatsimiinnermut atatillugu meeqqat atuarfiat pillugu peqqussummut allannguutissatut siunnersuut Naalakkersuit saqqummiutilersaarpaat. Siunnersuut tasaanerpaavoq Akileraartarnikkut Atugarissaarnik-kullu Ataatsimiititaliarsuup innersuutaanut malitseqartitsineq, ilaatigullu atuartut pillugit mappinut, akisussaaffimmik tunniussisarnernut, pitsaassutsimik nakunaarusianut malittarisassanik aalajangersaanerit kiisalu aqutsisut akisussaaffiisa suliaassaasalu ersarissarneri.

Taamatut oqaaseqarlunga apeqquteqaat aallaavigalugu oqallinnissamik Siumup sunnersuutaa tikilluaqqara, meeqqallu atuarfiata qanoq iliorluni pitsanngorsaqqinnerunissaanut annertunerumillu qanoq angusaqarniarfiunerusinnaaneranut Inatsisartut isumassarsiaasa tusarnissaat qilanaaralugu.

Oqallilluarisi.